

MEDITATIO CLXXI.

Miser in se revertitur, agit
poenitentiam et a patre denuo recipitur.

i. — In se autem reversus, dixit :
Quanti mercenarii in domo patris mei
abundant panibus, ego autem hic fame
pereo!

Surgam et ibo ad patrem meum, et dicam
ei : Pater, peccavi in celum et coram te :

Jam non sum dignus vocari filius tuus :
fac me sicut unum de mercenariis tuis.
(Luc. XV. 17, 18, 19.)

Non prius redit ad pristinam felicitatem,
quam in se rediens sentiret opprimentis
aerumnæ presentiam. (Gregorius Nyssenus.)

Ego non alienus, sed filius boni patris et
frater filii obsequantis, ego liber et generosus,
factus sum inferior mercenarii, a summa
celsitudine primæ nobilitatis ad infimam
humilitatem delapsus. (Chrysostomus.)

Cetera vero sunt poenitentiam meditantis
in confessione peccati, nondum tamen agen-
tis : Non enim jam dicit patri, sed dicturum
se esse promittit cum venerit.

Dicit ergo dicturum se esse patri, Pater.
(Augustinus.)

Quam misericors qui nec offensus, patrum
nomen dignatur audire ! Peccavi : Hæc est
prima confessio apud auctorem naturæ,

præsulem misericordiaæ, arbitrum culpæ. Sed
si Deus novit omnia, vocem tamen tuæ con-
fessionis exspectat : *Ore enim confessio fit
ad salutem. (Rom. X. — Ambrosius.)*

ii. — Et surgens venit ad patrem
suum. Cum autem adhuc longe esset, vi-
dit illum pater ipsius, et misericordia
motus est, et accurrens cecidit super col-
lum ejus, et osculatus est eum.

Dixitque ei filius : Pater peccavi in
celum et coram te, jam non sum dignus
vocari filius tuus. (Luc. XV. 20, 21.)

Hunc filium prodigum Spiritus sanctus
nobis descripsit, ut instruamur nos qualiter
debeamus cordis deplorare peccamina.
(Gregorius Nyssenus.)

Qui postquam dixit, *ibo ad patrem meum*,
quod ei cuncta attulit bona, non mansit, sed
totum iter transivit : sequitur enim : *et sur-
gens venit ad patrem suum*. Sic et nos fa-
ciamus, nec pigeat nos longitudinis viae :
quia si voluerimus, fiet regressus celer et
facilis, dummodo deseramus peccatum, quod
nos a domo paterna eduxit. Est autem pa-
ter redeuntibus clemens. (Chrysostomus.)

III. — Dixit autem pater ad servos
suos : Cito proferte stolam primam, et
induite illum, et date annulum in manum
ejus, et calceamenta in pedes ejus :

Et adducite vitulum saginatum, et occidite, et manducemus, et epulemur :

Quia hic filius meus mortuus erat et revixit : perierat, et inventus est. Et coepurunt epulari. (*Luc. XV. 22, 23, 24.*)

Pater ad filium sermonem non dirigit, sed ministris loquitur : quia qui poenitet orat : sed responsum verbo vere non accipit, misericordiam vero efficaciter in effectu. (*Chrysostomus.*)

Hæc ornamenta et vestimenta pretiosa que reverso ad patrem filio tribuntur, id significant quod probare Christus volebat, *majus esse gaudium super uno peccatore penitentiam agente, quam super nonaginta novem justis qui non indigent penitentia;* neque habere Deum rationem ullam præteriorum peccatorum, cum peccator ad illum totu corde convertitur, quominus eum in eundem aut meliorem etiam, quam quo ante peccatum fuerat, statum restituat. (*Menochius ibid.*)

MEDITATIO CLXXII.

Filium natu majorem indigne ferentem pater placat.

i. — Erat autem filius ejus senior in agro : et cum veniret, et appropinquaret domui, audivit symphoniam et chorum.

Et vocavit unum de servis, et interrogavit quid hæc essent.

Itaque dixit illi : Frater tuus venit, et occidit pater tuus vitulum saginatum, quia salvum illum recepit. (*Luc. XV. 25, 26, 27.*)

Ostendit siquidem hujusmodi indignatio, quod tantam demonstrat erga eos qui resistunt gratiam et gaudium, ut ceteris invidiā movere posset “ Quod est, ut justi iustum murmurandi materiam habere videri possint : certe justam causam nunquam satis admirandi.” Nam quod et ad illos qui sola sua aliorumque opinione sunt justi, revera autem injusti : quos et ipsos nomine senioris filii dicimus comprehendī, illi serio invidēt, et indignantur, ob eam quæ peccatoribus poenitentibus exhibetur clementiam, atque indulgentiam, quemadmodum manifestum est ex murmurationibus Scribarum et Pharisæorum quod Christus publicanos et peccatores recipiat. (*Euthymius citat. et interpret. in Cursu completo. ibid.*)

ii. — Indignatus est autem, et nolebat introire. Pater ergo illius egressus, cœpit rogare illum.

At ille respondens dicit patri suo : Ecce tot annis servio tibi, et nunquam mandatum tuum præterivi, et nunquam dedisti

mihi hædum ut cum amicis meis epularer.

Sed postquam filius tuus hic, qui devoravit substantiam suam cum meretricibus venit, occidisti illi vitulum saginatum. (*Luc. XV. 28, 29, 30.*)

Quām benignus et clemens pater, rogat filium, ut lātitiae domus particeps fiat! Magna certe benignitas humanitasque hujus patris. Cum enim posset servata majestatis suā gravitate, intus manere, et servis dicere, si recusat ingredi et nobis esse conviva, maneat foris, et mōrōre tabescat: ipse ad illum egreditur, rogat, laborat, et in omnia se vertit, ut utrique filio satisfaciat, utriusque amator.

Nec aliter Deus et Christus ejus patienter agit ac laborat, ut et peccatores pōnitentes clementissime recipiat, et justos doceat id ita omnino fieri debere, atque ita servet utrosque. (*Hieronym. citat. et interpret. in Curs. Compl. ibid.*)

III. — At ipse dixit illi: Fili tu semper mecum es, et omnia mea tua sunt:

Epulari autem, et gaudere oportebat, quia frater tuus hic, mortuus erat, et revixit: perierat et inventus est. (*Luc. XV. 31, 32.*)

Nullus ergo gravatim Dei judicia ferat,

sed gratum sit ei, si peccatores feliciter agant et salventur. Qui enim scis quem tu peccatorem censes, penitentiam agens gratior fiat? Quid item si occultas habet virtutes et propterea a Deo benigne recipitur. (*Theophylactus ibid.*)

MEDITATIO CLXXIII.

PARABOLA VIGESIMA SECUNDA.

Villici iniqui facientis sibi amicos de mammona iniquitatis.

I. — Dicebat Jesus ad discipulos suos: Homo quidam erat dives, qui habebat villicum: et hic diffamatus est apud illum quasi dissipasset bona ipsius.

Et vocavit illum, et ait illi: Quid hoc audio de te? redde rationem villicationis tuæ: jam enim non poteris villicare. (*Luc. XVI. 1, 2.*)

Quicumque sis, noveris te esse dispensatorem alienorum, et quod transitorii usus et brevis tibi jura concessa sunt. Abjecto ergo ab anima domini fastu, sumas humilitatem et modestiam villici. (*Chrysostomus.*)

Ex hoc ergo discimus non ipsos esse dominos, sed potius villicos alienarum facultatum. (*Ambrosius.*)

Deinde quod cum non exercemus dispensationem opum ad libitum Domini, sed ad proprias illecebras commissis abutimur, criminosi villici sumus. (*Theophylactus.*)

Et vocavit illum, etc. Quotidie talia nobis per effectus exclamat Dominus, ostendens nobis fruentem in meridie sospitate, priusquam vesperascat, exanimem : et alium inter prandia exspirantem; et diversimode ab hac villicatione discedimus. Sed fidelis dispensator, qui de propria dispensatione confidit, desiderat cum Paulo dissolvi, et esse cum Christo; is autem cuius sunt vota terrena, anxiatur in exitu. (*Chrysostomus.*)

II. — Ait autem villicus intra se : Quid faciam quia dominus meus aufert a me villicationem? fodere non valeo, mendicare erubesco.

Scio quid faciam, ut, cum amotus fuero a villicatione, recipiant me in domos suas. (*Luc. XVI. 3, 4.*)

Vita præsens habet exercitium mandatorum, futura vero solatium. Si nihil operatus es hic, frustra in futurum curas; sed nec mendicando proficies. Hujus indicium sunt virgines fatuae : quæ imprudenter a prudentibus mendicaverunt, sed reversæ sunt vacuae : quilibet enim suam conversationem ut tunicam induit; non est autem eam exuere, nec cambire cum alio. (*Chrysostomus.*)

III. — Convocatis itaque singulis debitoribus domini sui, dicebat primo : Quantum debes domino meo?

At ille dixit : Centum cados olei. Dixitque illi : Accipe cautionem tuam : et sede cito, scribe quinquaginta.

Deinde alii dixit : Tu vero quantum debes? Qui ait : Centum coros tritici. Ait illi : Accipe litteras tuas, et scribe octoginta. (*Luc. XVI. 5, 6, 7.*)

Quoties quis exitum suum percipiens, levat beneficio sarcinam peccatorum, vel relaxando debita debitori, vel tribuens inopibus copiam, ea quæ sunt Domini largiens : multos amicos conciliat præbituros sibi, coram judice, testimonium veritatis non vocibus, sed bonorum operum ostensione; quin etiam paraturos per testimonium refrigerii mansionem. (*Chrysostomus.*)

IV. — Et laudavit dominus villicum iniquitatis, quia prudenter fecisset : quia filii hujus sæculi prudentiores filiis lucis in generatione sua sunt.

Et ego vobis dico : Facite vobis amicos de mammona iniquitatis : ut, cum defeceritis recipiant vos in æterna tabernacula. (*Luc. XVI. 8, 9.*)

Si laudari potuit ille a domino qui fraudem faciebat, quanto amplius placeant Deo qui, secundum ejus præceptum, opera illa faciunt. (*Augustinus.*)

Ut ergo in sua manu homines post mortem quidquam inveniant, ante mortem divitias suas in pauperum manibus ponant. (*Gregorius.*)

MEDITATIO CLXXIV.

PARABOLA VIGESIMA TERTIA.

Divitis epulonis et Lazari mendici.

I. — Homo quidam erat dives qui indebatur purpura et byssō, et epulabatur quotidie splendide. (*Luc. XVI. 19.*)

Non omnis sancta paupertas, aut divitiæ criminosa; sed ut luxuria infamat divitias, ita paupertatem commendat sanctitas. (*Ambrosius.*)

Cinerem et pulverem et terram purpura et serico protegebat : secundum vestimenta ejus, ita et epulæ : ergo et nobis quales epulæ, talia et vestimenta. (*Chrysostomus.*)

II. — Et erat quidam mendicus, nomine Lazarus, qui jacebat ad januam ejus, ulceribus plenus.

Cupiens saturari de micis quæ cedabant de mensa divitis, et nemo illi dabat : sed et canes veniebant, et lingebant ulcera ejus. (*Luc. XVI. 20, 21.*)

Notandum est, quia in populo plus solent nomina divitium quam pauperum sciri. Dominus autem nomen pauperis dicit, et non men divitis non dicit : quia Deus humiles novit atque approbat, superbos ignorat. Ut autem amplius probaretur pauper, simul hunc et paupertas et ægritudo tabefecit. (*Gregorius.*)

Insuper pauper videbat procedentem divitem ab obsequentibus circumfulciri, se in infirmitate et inopia a nullo visitari : nam quia nemo ei ad visitandum aderat, testantur canes, qui latenter vulnera ejus lingebant. (*Gregorius.*)

Ulcera que nullus hominum lavare dignabatur et contrectare, ferae mites lambunt. (*Chrysostomus.*)

III. — Factum est autem ut moreretur mendicus, et portaretur ab Angelis in sinum Abrahæ. Mortuus est autem et dives, et sepultus est in inferno. (*Luc. XVI. 22.*)

Cum autem duo essent inferius corda, pauperis scilicet et divitis : unus desuper erat inspector, qui et pauprem tentando exercebat ad gloriam, et divitem tolerando exspectabat ad pœnam. (*Gregorius.*)

MEDITATIO CLXXV.

Divitis tormenta et Lazari solatia.

I. — Elevans autem oculos suos, cum esset in tormentis, vidit Abraham a longe, et Lazarum in sinu ejus.

Et ipse clamans dixit : Pater Abraham, miserere mei, et mitte Lazarum ut intingat extremum digiti sui in aquam ut refrigeret linguam meam, quia crucior in hac flamma. (*Luc. XVI. 23, 24.*)

Lazarus sursum erat, dives deorsum : illum plures Angeli portabant, illum infinita tormenta possidebant : totus enim in tormentis erat, oculos solos liberos habebat, ut alterius lætitiam posset adspicere, ut magis torqueatur, quia non habet quod alias habet. (*Chrysostomus.*)

Multi autem erant pauperes justi, sed qui jacuit ad limina ejus, adspectui occurrit ad ejus tristitiam.

Dives autem Lazarum non penes alium justum, sed in sinu Abrahæ videt : erat enim Abraham caritativus, hic autem crudelitatis arguitur ; ille sedens ante fores venabatur transeuntes, et in domum propriam ingerebat : hic vero et manentes intus avertebat. (*Chrysostomus.*)

Non tamen dirigit sermonem ad Lazarum, sed ad Abraham : quia forsitan eru-

MEDITATIO CLXXV.

bescebat, et putabat Lazarum reminisci malorum, ex propriis judicans de illo. (*Theophylactus.*)

Condignum autem præmium redditur diti illi ignis et infernalis poena, lingua arefacta : vice liræ sonantis, gemitus ; vice potus, desiderium stillæ ; vice speculorum enormium, caligo profunda : vice ambitus incessantis, pervigil vermis. (*Basilius.*)

II. — Et dixit illi Abraham : Fili recordare quia recepisti bona in vita tua, et Lazarus similiter mala : nunc autem hic consolatur, tu vero cruciaris. (*Luc. XVI. 25.*)

Si quid boni fecisti unde præmium datur, omnia accepisti in illo mundo, epulans, ditatus, oblectatus successibus prosperis : hic autem si quid mali commisit, universa recepit paupertate, fame et extremis oppressus miseriis ; et uteisque vestrum huc nudus accessit : hic quidem a peccatis, propter quod et consolationem sortitur : tu vero a justitia, propter quod immitigabilem perfers poenam. (*Chrysostomus.*)

III. — Et in his omnibus inter nos, et vos chaos magnum firmatum est : ut hi qui volunt hinc transire ad vos, non possint, neque inde huc transmeare. (*Luc. XVI. 26.*)

Videre possumus, transire non possumus : et nos videmus quid fugerimus, et vos videtis quid perdideritis ; et nostra gaudia cumulant vestra tormenta et vestra tormenta cumulant nostra gaudia. (*Chrysostomus.*)

Nec injusti ergo ad beatorum sortem transeunt, quia damnatione perpetua constringuntur ; nec justi ad reprobos transire possunt, quia erecti jam per justitiam judicii, eis nullo modo ex aliqua compassionemiserentur. (*Gregorius.*)

MEDITATIO CLXXVI.

Divitis cura in inferno de fratribus suis vivis.

I. — Et ait : Rogo ergo te pater ut mittas eum in domum patris mei.

Habeo enim quinque fratres, ut testetur illis, ne et ipsi veniant in hunc locum tormentorum. (*Luc. XVI. 27, 28.*)

Serius autem dives iste magister esse incipit, cum jam nec discendi tempus habeatur vel docendi. (*Ambrosius.*)

Qua in re notandum est ardentи diviti quanta supplicia cumulantur : ad poenam namque suam ei cognitio servatur et memoria : cognovit enim Lazarum quem dexpexit, et fratrum suorum meminit, quos reliquit :

ut enim peccatores in supplicio amplius puniantur ; et eorum vident gloriam quos contempserunt, et de illorum poena torquentur quos inutiliter amaverunt. (*Gregorius.*)

II. — Et ait illi Abraham : Habent Moysen, et prophetas : audiant illos.

At ille dixit : Non, pater Abraham : sed si quis ex mortuis ierit ad eos, poenitentiam agent. (*Luc. XVI. 29, 30.*)

Quasi dicat : Non sint tibi magis curae fratres tui quam Deo, qui eos creavit : statuitque eis doctores, qui eos commonerent et sollicitarent. (*Chrysostomus.*)

Sed et aliud quoddam dogma docemur : quod Lazari quidem anima non est erga praesentia sollicita, nec retorquet ad aliquod relictorum ; at dives, quod quodam visco, etiam post mortem a vita detinetur carnali : nam si quis omnino carnalis secundum mentem fiat, nec postquam corpus exuerit, removetur passionisejus. (*Gregorius Nyssenus.*)

III. — Ait autem illi : Si Moysen et prophetas non audiunt, neque si quis ex mortuis resurrexit, credent. (*Luc. XVI. 31.*)

Quaecumque dicunt Scripturae, dicit Dominus : unde etsi resurgat mortuus, etsi celitus descenderit Angelus, omnibus magis sunt dignae fide Scripturae : nam Angelorum Dominus, vivorum et mortuorum, eas

instituit. Si autem sciret hoc Deus, quod mortui resurgententes prodessent viventibus, non hoc omississet, qui pro utilitate nostra singula quæque tractat. Sed etsi crebro resurgerent mortui, hoc iterum tempore contemneretur : sed et diabolus facile introduceret perversa dogmata, id quoque per organa sua fingens, non quidem suscitans vere defunctos, sed quibusdam fallaciis spectantium frustans intuitum, vel ingenians quosdam mortem simulare. (*Chrysostomus.*)

MEDITATIO CLXXVII.

PARABOLA VIGESIMA QUARTA.

Iniqui Judicis et viduæ.

I. — Dicebat Jesus parabolam ad illos, quoniam oportet semper orare et non deficere :

Dicens : Judex quidam erat in quadam civitate, qui Deum non timebat, et hominem non reverebatur. (*Luc. XVIII. 1, 2.*)

Qui te redemit, quid te facere voluit demonstravit. Non vult te cessare a precibus : vult te beneficia meditari dum petis : vult te rogando accipere quod benignitas desiderat impetriri. Nec unquam oranti beneficia denegat qui ut orantes non deficiant, sua pietate instigat. (*Chrysostomus.*)

MEDITATIO CLXXVII.

407

Vide quod impudentem erga homines esse, gravioris est mali indicium : Deum enim quamplures non timent, attamen humano cohibentur pudore, et ideo minus peccant : cum vero sit aliquis impudens etiam quod homines, tunc excrescit cumulus vitiorum. (*Theophylactus.*)

II. — Vidua autem quædam erat in civitate illa, et veniebat ad eum dicens : Vindica me de adversario meo.

Et nolebat per multum tempus. (*Luc. XVIII. 3, 4.*)

Quoties nobis ab aliquibus irrogantur offendæ, tunc gloriosam esse putabimus oblivionem malorum : quoties vero aliquid ad ipsam Dei gloriam peccant, contra dogmatis divini ministros bellantes, tunc Deum adimus postulantes subsidium, et exclamantes contra impugnantes gloriam ejus. (*Cyrillus.*)

III. — Post hæc autem dixit intra se : Etsi Deum non timeo, nec hominem reveror :

Tamen quia molesta est mihi hæc vidua, vindicabo illam, ne in novissimo veniens sigillet me. (*Luc. XVIII. 4, 5.*)

Apud iniquissimum ergo judicem, usque ad effectum implendi desiderii valuit trahere perseverantia deprecantis.

MEDITATIO CLXXVIII.

Expositio præcedentis Parabolæ.

I. — Ait autem Dominus : Audite quid iudex iniquitatis dicit :

Deus autem non faciet vindictam electorum suorum clamantium ad se die ac nocte, et patientiam habebit in illis? (*Luc. XVIII. 6, 7.*)

Quæ ad orandum major hortatio, quam ut nobis de judge iniquo proponitur similitudo? Judge enim iniquus nec Deum timens, nec hominem reverens audivit tamen viduam interpellantem se, victus tædio, non pietate inclinatus. Si ergo exaudivit qui oderat quod erogabatur, quomodo non exaudit qui ut rogemus hortatur?

II. — Dico vobis quia cito faciet vindictam illorum. Verumtamen Filius hominis veniens, putas, inveniet fidem in terra? (*Luc. XVIII. 8.*)

Cum ergo nobis ista e contraria compunctione dominus suaderet, quia oportet semper orare et non deficere, adjecit et ait : *Verumtamen Filius hominis veniens, putas inveniet fidem in terra?*

Hoc autem Dominus adjicit ut ostendat quod si fides deficit oratio perit. Ergo ut

oremus, credamus; et ut ipsa fides non deficiat, oremus. Fides fundit orationem, fusa oratio fidei impetrat firmitatem. (*Augustinus. De verbis Domini. Serm. XXXVI.*)

MEDITATIO CLXXIX.

PARABOLA VIGESIMA QUINTA.

Pharisæi et Publicani.

I. — Dixit Jesus ad quosdam, qui in se confidebant tamquam justi, et aspernabantur ceteros, parabolam istam :

Duo homines ascenderunt in templum : unus Pharisæus, et alter publicanus. (*Luc. XVIII. 9, 10.*)

Quia fides non est superbiorum, sed humilium, præmissis subjecit parabolam de humilitate et contra superbiam. (*Augustinus.*)

Diligentiam quidem orationis docuit nos per viduam et judicem : hic autem per pharisæum et publicanum docet nos quomodo sint et dirigenda precamina, ne sit infructuosum orationis negotium. Condemnatus est autem pharisæus, cum incaute oraret. (*Græcus.*)

II. — Pharisæus stans, haec apud se orabat : Deus gratias ago tibi, quia non

sum sicut ceteri hominum : raptore, in-
justi, adulteri : velut etiam hic publi-
canus.

Jejuno bis in sabbato : decimas do
omnium quæ possideo. (*Luc. XVIII.
11, 12.*)

Dicit : *apud se orabat*, quasi non apud
Deum, quia ad seipsum redibat per pecca-
tum superbie. (*Basilius.*)

Quære autem in verbis ejus : nihil inve-
nies quod Deum rogaverit : ascendit qui-
dem orare ; noluit Deum rogare, sed se lau-
dare et roganti insultare. (*Augusti.*)

III. — Et publicanus a longe stans, no-
lebat nec oculos ad cœlum levare : sed
percutiebat pectus suum, dicens : Deus
propitius esto mihi peccatori. (*Luc.
XVIII. 13.*)

Quamvis autem publicanus stetisse dicar-
tur, distabat tamen a pharisæo tam verbis
quam habitu, necnon et corde contrito : nam
verebatur oculos levare in cœlum, censens
indignos visionis supernæ eos qui maluerunt
bona terrena spectare et querere : necnon
et pectus tundebat, cor quodammodo pun-
gens causa cogitationum pravorum, nec non
et excitans ut dormitans : unde non aliud
quam Deum propitiatorem petebat. (*Theo-
phylactus.*)

iv. — Dico vobis descendit hic justifi-
catus in domum suam ab illo, quia omnis
qui se exaltat, humiliabitur : et qui se hu-
miliat, exaltabitur. (*Luc. XVIII. 14.*)

Audisti superbum accusatorem, audisti
humilem reum, audi nunc judicem dicen-
tem : *Dico vobis*, etc. (*Augustinus.*)

Geminos aurigas et duas bigas in stadio
positas sermo præsens proponit : in altera
peccatum et humilitatem : et vides bigam
peccati superare justitiam, non propriis vir-
tutibus, sed humilitatis conjunctæ; illam
vero devictam non fragilitate justitiae, sed
mole et tumore superbia : nam sicut humili-
itas per sui eminentiam peccati pondus su-
perat, et saliens attingit Deum : sic superbia
ob sui molem de facili justitiam de-
primit. Si ergo plura facta strenue geras,
putas autem te posse præsumere, tota ca-
ruisti oratione : si vero mille feras in con-
scientia fasces reatuim, et hoc solum de te
credas quod es infimus omnium, multam
obtinebis ante Deum fiduciam. Et ideo sua
sententiae causam assignans subdit : *quia
omnis qui se exaltat humiliabitur; et qui se
humiliat exaltabitur.* (*Chrysostomus.*)



MEDITATIO CLXXX.

PARABOLA VIGESIMA SEXTA.

De operariis in vineam conductis.

I. — Dixit Jesus : Simile est regnum coelorum homini patrifamilias qui exiit primo mane conducere operarios in vineam suam.

Conventione autem facta cum operariis ex denario diurno, misit eos in vineam suam. (*Matth. XX. 1, 2.*)

Scitote, quia mercenarii sumus conducti. Sicut ergo nemo ideo conduit mercenarium, ut hoc solum faciat quod manducat; sic et nos non ideo vocati sumus a Christo ut haec solum operemur quae ad nostrum pertinent usum, sed ad gloriam Dei : et sicut mercenarius prius adspicit opus suum, deinde quotidianum cibum : sic et nos primum debeamus adspicere quae ad gloriam Dei pertinent, deinde quae ad nostram utilitatem : et sicut mercenarius totam diem circa domini opus impendit, unam autem horam circa suum cibum, sic et nos omne tempus vite nostrae debemus impendere circa gloriam Dei, modicam autem partem circa usus nostros terrenos. (*Chrysostomus.*)

Salutis autem arbitror nomen esse denarium. (*Origenes.*)

Denarius enim dicitur qui antiquitus pro decem nummis imputabatur, et figuram regis habet. Recte ergo per denarium designatur observati decalogi praemium. Pulchre ergo dicit : *Conventione facta ex denario diurno : quia unusquisque, in agro sanctae Ecclesiae, pro spe futurae remunerationis laborat.* (*Remigius.*)

II. — Et egressus circa horam tertiam vidit alios stantes in foro, otiosos.

Et dixit illis : Ite et vos in vineam meam, et quod justum fuerit dabo vobis.

Illi autem abierunt. (*Matth. XX. 3, 4, 5.*)

Qui sibi vivit, qui carnis sua voluptatibus pascitur, recte otiosus arguitur, quia fructum divini operis non sectatur. (*Gregorius.*)

Nota quod solis primis convenit specialiter dare denarium : alios autem sub incerto pacto conduxit, dicens : *quod justum fuerit dabo vobis.* (*Chrysostomus.*)

Poterant enim aequale opus facere in vinea eis qui ex mane sunt operati, quicumque in tempore brevi volebant operantem virtutem ad opus extendere, quae ante non fuerat operata. (*Origenes.*)

III. — Iterum autem exiit circa sextam, et nonam horam : et fecit similiter.

Circa undecimam vero exiit, et invenit

alios stantes, et dixit illis : Quid hic statis tota die otiosi?

Dicunt ei : Quia nemo nos conduxit. Dicit illis : Ite et vos in vineam meam. (*Matth. XX. 5, 6, 7.*)

Mane nostrum pueritia est; hora tertia adolescens intelligi potest; sexta autem juventus est; nona autem senectus intelligitur; undecima vero est ea ætas quæ decrepita vel veterana vocatur. (*Gregorius.*)

Quod autem non omnes simul conduxit, sed alios mane, alios hora tertia, et sic de aliis, ex differentia mentis eorum processit. Tunc enim eos vocavit quando erant obedienti, nam et latronem vocavit quando obediatur, erat. Si autem dicant, *quia nemo nos conduxit*, sicut dictum est, non oportet omnia scrutari quæ in parabolis sunt. Item hoc non dicit dominus, sed operarii : quod ipse enim omnes, quantum ad se pertinet, a prima ætate vocet, significatur cum dicitur : *Exiit primo mane operarios conducere.* (*Chrysostomus.*)

MEDITATIO CLXXXI.

Denarius idem singulis datur.

I. — Cum sero autem factum esset, dicit dominus vineæ procuratori suo : Voca

operarios, et redde illis mercedem incipiens a novissimis usque ad primos. (*Matth. XX. 8.*)

Considera, quia sero, non alio mane mercedem reddit : ergo adhuc stante saeculo isto judicium est futurum, et unicuique merces sua reddenda : et hoc propter duas rationes. Prima est, quia ipsa beatitudo futura est merces justitiae : ideo non illo saeculo fit judicium, sed ante illud. Deinde ante adventum diei illius præmittit judicium, ne videant peccatores diei illius beatitudinem. (*Chrysostomus.*)

Dominus Jesus Christus ipse est pater familias et vineæ procurator, sicut ipse est et ostium et ostiarius. Ipse enim est venturus ad judicium, ut unicuique reddat secundum quod gessit. Vocat ergo operarios et reddit illis mercedem, quando omnes congregabuntur in judicio, ut unusquisque accipiat secundum opera sua. (*Remigius.*)

Ut ostendat Deus inæstimabilem misericordiam suam, primum novissimis et indigitoribus reddit mercedem, postea primis : nimia enim misericordia ordinem non aspergit. (*Chrysostomus.*)

II. — Cum venissent ergo qui circa undecimam horam venerant, acceperunt singulos denarios (*Matth. XX. 9.*)

Eumdem denarium accipiunt qui laboraverunt ad undecimam et qui laboraverunt ad primam : quia aequalem vite æternæ retributionem sortiti sunt cum his qui ab initio vocati fuerant, hi qui in fine ad Deum venirent. (*Gregorius.*)

III. — Venientes autem et primi, arbitrati sunt quod plus essent accepturi : acceperunt autem et ipsi singulos denarios. (*Math. XX. 10.*)

Finis parabola est mercedem vitæ æternæ, non tempori quod quis laboravit, sed labore et opere quod fecit respondere, dixerat enim : "Multi erunt primi novissimi, et novissimi primi." Sæpe enim fieri ut aliquis una hora tantum laboret, quantum aliis tota die, ideoque aequalem mercedem, id est, eumdem denarium accepturum esse, eodem plane sensu quo Sapiens dixit : "Consummatus in brevi explevit tempora multa." *IV. 13.* (*Du Hamel. in Curs. Comp. ibid.*)

MEDITATIO CLXXXII.

Murmuratio adversus Patrem-familias.

I. — Et accipientes murmurabant adversus patremfamilias.

Dicentes : Hi novissimi una hora fecerunt, et pares illos nobis fecisti, qui portavimus pondus diei et aestus. (*Matth. XX. 11, 12.*)

Pondus diei et aestus ferre, est per longioris vitæ tempora carnis sue calore fatigari. Sed potest quæri : quomodo murmurare dicti sunt, qui ad regnum vocantur? Celorum etenim regnum nullus qui murmurat accipit, nullus qui accipit murmurare potest. (*Greg.*)

Non autem oportet ea que in parabolis sunt, secundum totum quod dicitur, investigare; sed intentionem propter quam composita est intelligere, et nihil ultra scrutari. Non ergo inducit hoc, ut ostendat aliquos esse invidia morsos; sed ut ostendat hos tanto potitos esse honore, quod et invidiam aliis poterat generare. (*Chrysostomus.*)

II. — At ille respondens uni eorum dixit : Amice non facio tibi injuriam : nonne ex denario convenisti mecum?

Tolle quod tuum est, et vade : volo autem et huic novissimo dare sicut et tibi.

Aut non licet mihi quod volo facere? An oculus tuus nequam est, quia ego bonus sum? (*Matth. XX. 13, 14, 15.*)

Quia ipsa vita æterna pariter erit omnibus sanctis aequalis, denarius omnibus est

attributus, qui est omnium merces : quia vero in ipsa vita æterna distincte fulgebunt flamina meritorum, multæ mansiones sunt apud Patrem : ac in denario quidem impari non vivet alius alio prolixius : in multis autem mansionibus honoratur alius alio clarius. (*Augustinus.*)

Et quia ipsa regni perceptio ejus est bonitas voluntatis : recte subjungitur : *Aut non licet mihi quod volo facere?* Stulta enim est quæstio hominis contra bonitatem Dei murmurare. Conquirendum quippe esset, non si dat quod non debet; sed si non daret quod deberet : unde aperte subditur : *An oculus tuus nequam est, quia ego bonus sum.* (*Gregorius.*)

III. — Sic erunt novissimi primi, et primi novissimi : multi enim sunt vocati, pauci vero electi. (*Matth. XX. 16.*)

Ideo primos dicit novissimos, non ut novissimi digniores sint quam primi, sed ut coæquentur, et ut nulla sit inter eos differentia temporis causa. (*Chrysostomus.*)

Ad fidem plures veniunt, et ad cœlestè regnum pauci perducuntur; plerique enim Deum vocibus sequuntur moribus fugiunt. Ex hoc ergo duo pensare debemus. Primum est ut de se quisque minime præsumat; quia etsi jam ad fidem vocatus est, utrum ad regnum eligendus sit, nescit. Secundum vero

est ut unusquisque proximum suum quem jacere in vitiis conspicit, desperare non audeat : quia divinæ misericordiæ divitias ignorat. (*Gregorius.*)

MEDITATIO CLXXXIII.

PARABOLA VIGESIMA SEPTIMA.

De decem mnis in servos
ad negotiandum distributis.

I. — Dixit Jesus : Homo quidam nobilis abiit in regionem longinquam accipere sibi regnum, et reverti.

Vocatis autem decem servis suis, dedit eis decem mnas, et ait ad illos : Negotiamini dum venio. (*Luc. XIX. 12, 13.*)

Per hoc quod profectus est Dominus, ad regionem longinquam, ascensum proprium a terra in celum designat; cum vero subdit, *accipere sibi regnum et redire*, secundam sui apparitionem gloriosam et regiam ostendit. Et primo quidem hominem se vocat propter nativitatem in carne, deinde nobilem; Quamvis servus factus sit, est tamen nobilis secundum ineffabilem ortum a Patre. (*Cyrillus.*)

Necnon secundum genus humanum, ex semine David secundum carnem exortus. (*Basilius.*)

Nondum autem se regem appellat, quia nondum in prima apparitione regia fundebatur majestate. Sed et bene dicitur obtinere sibi regnum : nam dante sibi Patre illud obtinuit, secundum illud Danielis VII : " Ecce Filius hominis veniebat in nubibus, et datum est ei regnum. " (*Eusebius.*)

Ascendens autem dispensavit credentibus in eum divinorum charismatum differentiam : sicut servis committuntur dominicæ facultates, ut aliquid lucrantes, famulatus sui ferant præconia. (*Cyrillus.*)

Numerus denarius hoc loco, multitudinis duntaxat manifestativus est, tam de servis quam de minis. (*Euthymius, ibid.*)

II. — Cives autem ejus oderant eum : et miserunt legationem post illum dicentes : Nolumus hunc regnare super nos.

Et factum est ut rediret accepto regno : et jussit vocari servos, quibus dedit pecuniam, ut sciret quantum quisque negotiatus esset. (*Luc. XIX. 14, 15.*)

Hoc est quod Christus improperavit Judæis dicens, (*Joan. XV.*) " Nunc vero videbunt et oderunt me et Patrem. " Renuerunt autem regnum ejus, dicentes Pilato, (*ibid. XIX.*) " Non habemus regem nisi Cæsarem. " (*Cyrillus.*)

Per hoc enim quod dicit, *Cives ejus* Judæos significat ortos ex eadem progenie secundum

carnem, et quoniam ritu legis cum illis pariter utebatur. (*Eusebius.*)

Miserunt autem legationem post eum, quia etiam post resurrectionem ejus immiserunt persecutions apostolis, et prædicationem Evangelii respuerunt. (*Augustinus.*)

Redit accepto regno, quia in manifestissima claritate venturus est qui eis humilis apparuit, cum diceret. (*Joan. XIX.*) " Regnum meum non est de hoc mundo. " (*Augustinus.*)

Redeunte autem Christo, sumpto regno merebuntur præconia, et delectabuntur verbis ministri in supernis honoribus, quia multiplicaverunt talentum pluribus acquisitis. (*Cyrillus.*)

III. — Venit autem primus dicens : Domine mna tua decem mnas acquisivit.

Et ait illi : Euge bone serve, quia in modico fuisti fidelis, eris potestatem habens super decem civitates. (*Luc. XIX. 16, 17.*)

Nam sicut Angeli præsunt, ita et hi qui vitam meruerint Angelorum. (*Ambrosius.*)

Esto potestatem habens, hoc est, ex earum quas imbueras animarum fide et conversione, magnus sublimisque fulgens. (*Beda.*)

IV. — Et alter venit dicens : Domine mna tua fecit quinque mnas.

Et huic ait : Et tu esto super quinque civitates. (*Luc. XIX. 18, 19.*)

Conformiter ad mensuram studii cujusque, mensuratur et honor ac beneficium. (*Euthymius. Ibid. V. 17.*)

MEDITATIO CLXXXIV.

Servus nequam ex ore suo judicatur.

I. — Et alter venit, dicens : Domine ecce mna tua, quam habui repositam in sudario.

Timui enim te, quia homo austerus es : tollis quod non posuisti, et metis quod non seminasti. (*Luc. XIX. 20, 21.*)

Sudario enim mortuorum facies velatur : merito ergo hic piger dicitur mniam in sudario involvisse, quia eam mortificans, et otiosam dimittens, non tractavit nec auxit. (*Theophylactus.*)

Vel pecuniam in sudario ligare, est percepta dona sub otio lenti corporis abscondere. Quod autem putaverat se per excusationem dixisse, in culpam propriam vertitur. (*Beda.*)

II. — Dicit ei : De ore tuo te judico serve nequam : sciebas quod ego homo

austerus sum, tollens quod non posui, et metens quod non seminavi :

Et quare non dedisti pecuniam meam ad mensam, ut ego veniens cum usiris utique exegisset illam? (*Luc. XIX. 22, 23.*)

In sensibilibus divitiis debitores solius observationis obnoxii sunt : quantum enim recipiunt tantum eos reddere necesse est, et nihil plus ab eis queritur. In divinis autem eloquis non solum ad custodiam obligamur, sed etiam multiplicare monemur. (*Chrysostomus.*)

III. — Et adstantibus dixit : Auferte ab illo mnam, et date illi, qui decem mnas habet.

Et dixerunt ei : Domine, habet decem mnas. (*Luc. XIX. 24, 25.*)

Qui enim gratia non bene utuntur, sed peccant, gratiam sanctificantem amittunt. *Date illi qui decem mnas habet,* est parabolæ parergon : neque enim gratia quæ ab uno aufertur, alteri datur. Itaque ita loquitur ad explendam parabolam, quia ita aliquando fit inter homines, ut quod uni ignavo et infideли servo tollitur, gravo et industrio, qui bene acceptis utitur tribuatur. (*Menochius. Com. in Matth.*)

IV. — Dico autem vobis, quia omni habenti dabitur, et abundabit : ab eo autem qui non habet, et quod habet auffetur ab eo. (*Luc. XIX. 26.*)

Hæc non solum ad sermonem et doctrinam referenda sunt, sed etiam ad morales virtutes : quoniam et in his dat nobis Deus sua charismata, hunc dotans jejuno, illum oratione, alium mansuetudine vel humilitate : quibus si invigilaverimus, multiplicabimus ea : si vero tepeamus, extinguemus. (*Theophylactus.*)

MEDITATIO CLXXXV.

PARABOLA VIGESIMA OCTAVA.

Duorum filiorum, unius poenitentis et patri obedientis, alterius fingentis se obedire.

I. — Homo quidam habebat duos filios, et accedens ad primum, dixit : Fili, vade hodie, operare in vinea mea.

Ille autem respondens, ait : Nolo. Postea autem poenitentia motus, abiit. (*Matth. XXI. 28, 29.*)

Quis ille nisi Deus qui omnes homines creavit : qui cum sit natura Dominus, tamen

vult magis diligi quasi pater, quam timeri ut dominus? Major filius, Gentium populus erat : minor vero populus Judæorum. (*Chrysostomus.*)

Alii putant non Gentilium et Judæorum esse parabolam, sed simpliciter peccatorum et justorum : eo quod illi quidem per mala opera Deo servire negaverunt, postea poenitentiae baptismum acceperunt a Joanne; Pharisæi autem, qui justitiam proferebant, et legem Dei se facere jaſtabant, Joannis contempto baptismate, ejus præcepta non fecerunt. (*Hieronymus.*)

II. — Accedens autem ad alterum, dixit similiter. At ille respondens, ait : Eo, domine, et non ivit.

Quis ex duobus fecit voluntatem patris? Dicunt ei : Primus. (*Matth. XXI. 30, 31.*)

Hoc autem ideo introducit, quia sacerdotes non discendi causa sed tentandi interrogaverant, multi autem ex populis crediderant : et ideo introducit parabolam duorum filiorum, ostendens eis per eam, quia meliores sunt populares, qui a principio sæcularem profitentur vitam, quam sacerdotes, qui a principio profitentur Deo servire : quoniam populares quidem aliquando compuncti convertuntur ad Deum : sacerdotes autem impoenitibiles constituti, nunquam

desinunt peccare in Deum. Prior enim filius populus est : non enim populus est propter sacerdotes, sed sacerdotes propter populum. (*Chrysostomus.*)

III. — Dicit illis Jesus : Amen dico vobis, quia publicani, et meretrices praecedent vos in regnum Dei.

Venit enim ad vos Joannes in via justiae, et non credidistis ei : publicani autem et meretrices crediderunt ei : vos autem videntes nec poenitentiam habuistis postea, ut crederetis ei. (*Matth. XXI. 31, 32.*)

Puto autem, quod ex persona omnium virorum peccatorum publicani ponuntur, et ex persona omnium mulierum peccatricum, meretrices : quia avaritia praecipue in viris abundat, fornicatio autem in mulieribus : mulier enim in quiete sedet inclusa, fornicatio autem maxime ex otio nascitur : vir autem, quoniam in actibus rerum diversarum est assidue, in avaritiae peccatum facile incurrit ; in fornicationem autem non facile, nisi multum sit lascivus : nam occupatio virilium sollicitudinum, voluptatem plerunque excludit : unde proprium est hoc adolescentium nihil agentium. (*Chrysostomus.*)

—*—

MEDITATIO CLXXXVI.

PARABOLA VIGESIMA NONA.

Locatæ vineæ cujus conductores occiderunt Heri servos et filium.

I. — Aliam parabolam audite. (*Matth. XXI. 33.*) Cœpit autem dicere ad plebem parabolam hanc. (*Luc. XX. 9.*)

Homo erat paterfamilias, qui plantavit vineam, et sepem circumdedit ei, et fodit in ea torcular, et ædificavit turrim, et locavit eam agricolis, et peregre profectus est. (*Matth. XXI. 33. — Marc. XII. 1.*) Et ipse peregre fuit multis temporibus. (*Luc. XX. 9.*)

Homo paterfamilias Deus est, qui dicitur homo in quibusdam parabolis : sicut si pater cum parvulo filio suo loquatur infantilia, ut descendat ad verba filii sui, et instruat eum. (*Origenes.*)

Plantavit autem vineam, de qua loquitur Isaias : (*Cap. V.*) “ Vinea Domini Sabaoth, domus Israel est. ” (*Hieronymus.*)

Per sepem intellige custodiam patrum justorum, qui tamquam murus facti sunt populo Israel. (*Chrysostomus.*)

Prophetas quasi quædam torcularia aptavit, in quos musti modo, quædam ubertas

Spiritus sancti ferventius influeret. (*Hilarius.*)

In turre eminentiam legis exstruxit, quae et in cœlum ex solo egressa proveheret, et ex qua speculari Christi posset adventus. (*Hilarius.*)

Et locavit eam agricolis. Quando scilicet per legem constituti sunt sacerdotes et levitæ, et procurationem regendi populum suscepserunt. (*Chrysostomus.*)

Et peregre profectus est. : quia Dominus, qui fuerat cum illis in nube diei et in columna ignis per noctem, nequaquam postea similiter apparuit illis. (*Origenes.*)

II. — Cum autem tempus fructuum appropinquasset. (*Matth. XXI. 34.*) Misit servum ut ab agricolis acciperet de fructu vineæ. (*Marc. XII. 2.*) Ut de fructu vineæ darent illi. (*Luc. XX. 10.*) Qui apprehensum eum ceciderunt. (*Marc. XII. 3.*) — Qui cæsum dimiserunt eum inanem. (*Luc. XX. 10.*) Vacuum. (*Marc. XII. 3.*)

Servos dicit Prophetas qui offerunt, quasi sacerdotes Domini, populi fructus, et obedientiae ostensionem per opera. Hi autem non solum malitia potiti sunt in non dando fructum, sed etiam indignando ad eos qui venerunt : et sanguine manus impleverunt. (*Chrysostomus.*)

III. — Et iterum misit ad illos alium servum. (*Marc. XII. 4.*) Et addidit alium servum mittere. (*Luc. XX. 11.*)

Et illum in capite vulneraverunt et contumeliis affecerunt. (*Marc. XII. 4.*) Et dimiserunt inanem. (*Luc. XX. 11.*)

Primi servi qui missi sunt, ipse legifer Moyses intelligitur, et Aaron primus sacerdos Dei, quos cæsos flagello lingue vacuos emiserunt : alios autem servos, prophetarum choros intellige. (*Rabanus.*)

Cæciderunt quidem, ut Hieremiam : occiderunt, ut Isaiam : lapidaverunt, ut Nabor et Zachariam. (*Hieronymus.*)

IV. — Et rursum alium misit. (*Marc. XII. 5.*) Et addidit tertium mittere : qui et illum vulnerantes ejecerunt (*Luc. XX. 12.*) Et illum occiderunt : et plures alios, quosdam cædentes, alios vero occidentes. (*Marc. XII. 5.*)

Et agricolæ, apprehensis servis ejus, alium ceciderunt, alium occiderunt, alium vero lapidaverunt.

Iterum misit alios servos plures prioribus, et fecerunt illis similiter. (*Matth. XXI. 35, 36.*)

Per singulos autem gradus malitia, Dei misericordia addebat : et per singulos